

**V E N D I M**  
**Nr. 182, datë 25.4.1995**

**PËR ÇMIMET E SHITJES SË BARNAVE**

*(Ndryshuar me VKM nr. 21, datë 13.1.1997; nr. 307, datë 19.5.1998; nr. 511, datë 30.7.2004)*

*(i përditësuar)*

Në bazë të ligjit nr.7815, datë 20.4.1994 “Për barnat” dhe të ligjit nr.7870, datë 13.10.1994 “Për sigurimet shëndetësore në Republikën e Shqipërisë”, me propozimin e Ministrisë së Shëndetësisë dhe të Mbrojtjes së Mjedisit, Këshilli i Ministrave

**V E N D O S I:**

1. *Kufiri maksimal i çmimit të shitjes me shumicë të barnave nga grosistët caktohet deri në 12 për qind mbi çmimin fillestar të blerjes CIF, konvertuar në lekë sipas kursit përkatës mesatar për çdo 6-mujor që njoftohet nga Banka e Shqipërisë.*

*Kufiri maksimal i çmimit të shitjes me shumicë i barnave nga prodhuesit e vendit caktohet deri në 17 për qind mbi koston e prodhimit.*

2. *Kufiri maksimal i çmimit të shitjes me pakicë të barnave nga farmacitë e rrjetit të hapur, caktohet deri në 27 për qind mbi çmimin e blerjes që del pas shtesës, që i bëhet atij sipas pikës 1 të këtij vendimi.*

3. *Struktura e çmimeve të barnave të listës kryesore, për efekt të rimbursimit, miratohet nga ministri i Shëndetësisë dhe i Mbrojtjes së Mjedisit, sipas propozimit të Institutit të Sigurimeve të Kujdesit Shëndetësor.*

*Gjithashtu, Ministri i Shëndetësisë dhe i Ambientit miraton intervalet e marzheve të çmimeve të shitjes me shumicë e pakicë të barnave në përputhje me pikat 1 dhe 2 të këtij vendimi, sipas propozimit të Komisionit të çmimit të barnave.*

4. *Çmimet e shitjes reference të barnave të listës kryesore shërbejnë si kufij maksimalë në llogaritjen e masës së rimbursimit të çmimeve të barnave të kësaj liste dhe janë të detyrueshme për zbatim nga të gjitha farmacitë e rrjetit të hapur.*

*Farmacitë i afishojnë në vende të dukshme çmimet e shitjes së barnave për popullsinë sipas emërtesës së listës kryesore, si dhe listën e barnave thelbësore.*

4.1 *Barnat që hidhen në treg dhe qarkullojnë në Republikën e Shqipërisë, kanë të vendosur mbi kutinë e ambalazhit një pullë, për efekt kontrolli, si provë e regjistrimit të tyre, e marrjes së autorizimit për hedhjen e tyre në treg dhe për respektimin e çmimit përfundimtar të shitjes. Pulla e kontrollit i jepet subjektit fabrikues të barnave në Republikën e Shqipërisë ose subjektit shitës me shumicë të barnave nga Qendra Kombëtare e Kontrollit të Barnave, kundrejt pagesës, për çdo seri të barit të fabrikuar në vend ose të importuar.*

a) *Pulla e kontrollit përmban në mënyrë të detyrueshme këto të dhëna:*

*- emërtimin e barit;*

*- formë-dozën;*

*- serinë e prodhimit të barit;*

*- emrin e fabrikuesit/të importuesit të barit në Republikën e Shqipërisë;*

*- çmimin e shitjes me pakicë të barit;*

*- emërtimin e autoritetit që lëshon pullën: Qendra e Kombëtare e Kontrollit të Barnave.*

*Katër nënpikat e para të shkronjës “a” mund të shprehen në mënyrë të shifruar, me përjashtim të dy nënpikave të fundit, të cilat duhen shprehur me fjalë.*

b) *Pulla e kontrollit vendoset prej subjektit fabrikues të barnave dhe subjektit shitës me shumicë të barnave mbi kutinë ambalazhuese të barit. Ajo i referohet deklaramentit të fabrikuesit*

*ose shitësit me shumicë të barit dhe autorizimit për hedhjen në treg, për çdo seri të veçantë.*

*4/2. Hedhja në treg, shitja me shumicë dhe me pakicë e barnave nga subjektet pa pullën e kontrollit përbën shkëlje të rregullave të fabrikimit e të tregtimit dhe ndëshkohet sipas neneve 53 e në vijim, të ligjit nr.7815, datë 20.4.1994 “Për barnat”, të ndryshuar.*

*4/3. Barnat e hedhura në treg dhe që janë në qarkullimin brenda 90 ditësh nga hyrja në fuqi e këtij vendimi, duhet të pajisen me pullën e kontrollit.*

5. Miratohet lista e barnave thelbësore sipas listës që i bashkëngjitet këtij vendimi.

6. Instituti i Sigurimeve të Kujdesit Shëndetësor rimbursen 100 për qind recetat për barnat thelbësore për fëmijët 0-12 muaj, për invalidët e Luftës, për invalidët e grupit të I-II për sëmundjet për të cilat kanë dalë invalidë, për kurimin e TBC-së dhe të kancerit sipas listës së miratuar nga Ministria e Shëndetësisë dhe e Mbrojtjes së Mjedisit dhe rimbursen 50 për qind recetat për invalidët e grupit III-IV për sëmundjet për të cilat kanë dalë invalidë.

Ministria e Shëndetësisë dhe e Mbrojtjes së Mjedisit cakton listën e barnave thelbësore të nevojshme për kurimin e sëmundjeve të TBC-së dhe të kancerit.

7. Instituti i Sigurimeve të Kujdesit Shëndetësor ka kompetencë që gjatë vitit të bëjë ndryshime në strukturën e çmimeve të barnave të listës kryesore sipas pikës 3 të këtij vendimi.

*7.1 Bazat grosiste të barnave të vënë në dispozicion të Institutit të Sigurimeve të Kujdesit Shëndetësor dhe degëve të tij në rrethe informacion për çmimin e blerjes e të shitjes së barnave dhe sasinë e tyre. Instituti i Sigurimeve të Kujdesit Shëndetësor përcakton afatin e dërgimit të këtij informacioni dhe e kontrollon atë.*

8. Për zbatimin e këtij vendimi ngarkohet Ministria e Shëndetësisë dhe e Mbrojtjes së Mjedisit dhe Instituti i Sigurimeve të Kujdesit Shëndetësor.

9. Vendimet e Këshillit të Ministrave nr.17, datë 24.1.1994 “Për ndryshimin e çmimeve të shitjes me pakicë të barnave dhe vendosjen e kufijve maksimalë të shitjes së tyre nga subjektet private”, nr.483, datë 29.8.1994 “Për vendosjen e kufijve maksimalë të çmimit të shitjes së barnave nga subjektet private”, nr.525, datë 17.10.1994 “Për subvencionimin nga shteti të barnave thelbësore”, nr.51, datë 23.1.1959, pika 3 “Për masat për uljen e mëtejshme të vdekjeve në fëmijët e moshës së gjirit”, nr.83, datë 16.3.1983, pika 2 “Për uljen e çmimeve të shitjes me pakicë të disa barnave të vendit dhe të importit”, nr.247, datë 27.5.1993 “Për subvencionimin nga shteti të një pjese të faturës së shpenzimeve për preparatet mjekësore të nevojshme për mjekimin e invalidëve”, shfuqizohen.

Ky vendim hyn në fuqi menjëherë.

KRYETARI I KËSHILLIT TË MINISTRAVE  
**Aleksandër Meksi**